

艺
文
类
聚

艺

文

类

聚

藝文類聚卷第八十六

唐太子率更令弘文館學士歐陽詢撰

明

秣

陵

王元貞校

菓部上

李橘

桃

櫻桃

梅

石榴

梨

柑

李

春秋運斗樞曰玉衡星散為李

爾雅曰休無實李

毛詩曰投我以木李報之以瓊玖又曰何彼穠矣華

如桃李

韓詩外傳曰子質仕魏文侯獲罪而北遊謂簡主曰
吾所樹堂上之士半朝廷之大夫半邊境之人亦半
今堂之人惡我於君朝廷之士危我於法邊境之人
劫我矣簡主曰夫春樹桃李夏得蔭其下秋得食其
實春樹蒺藜夏不得采其葉秋得其刺焉今子所樹
非其人也

東方朔占曰朔與弟子俱行朔渴令弟子叩道邊家
門不知室主姓名呼不應朔復往見博勞飛集其家
李樹上朔謂弟子曰主人當姓李名博勞汝呼當應
室中人果有姓李名博勞出與朔相見即入取飲與

之

魯安生別傳李少君曰鍾山之李大如瓶

神仙傳曰老子毋適到李樹之下生老子生而能言
指李樹曰以此樹爲我姓

抱朴子曰五原蔡縱入山而還其家人云到崑崙山
有玉李形如世間者但光明洞徹而堅以玉井冰洗
之便軟而可食

廣志曰車下李車上李又曰麥李細小有溝道有青
李馬肝李赤李房陵李

世說曰王戎年七歲嘗與諸小兒遊睹道邊李樹有

子折枝諸小兒競走取之惟戎不動人問之荅曰樹在道邊而多子此必苦李也取之信然又曰王安豐有好李常賣之恐人得之常鑽其核

列子曰師門嘯父弟子食桃李葩

孟子匡章曰陳仲子豈不誠廉士哉居於陵三日不食耳目無聞見井上有李蠶食實者過半矣匍匐往食之三咽然後耳有聞目有見

潘岳閑居賦曰房陵朱仲之字

左傳曰齊都露霜李房陵縹李

詩曰丘中有李彼留之子北山有李投我以桃報之

以李

西京雜記曰漢武修上林苑羣臣各獻其果樹有合
枝李朱李黃李青房李燕李獲李沉朱李浮素李
洞冥記曰琳國去長安九萬里生玉葉李色如碧玉
數十歲一熟味酸昔韓衆嘗餌此李因名韓衆李
禮記曰食棗桃李弗致于核

魏文帝與吳質書曰沉朱李於寒水

荊州記曰房陵有好李

列異傳曰度素君謂南海君曰昔廬山共食白李未
久已三千載

風土記曰南郡有細李有青皮李

文選曰南國有佳人容華若桃李

古歌詞曰桃生露井上李生桃樹傍蟲來齧桃根
李樹代桃僵樹木身相代骨肉還相忘

梁沈約詠李詩曰青玉冠西海碧石彌外區化爲中
園實其下成路衢色潤房陵縹味奪寒水朱

陳江總詠李詩曰嘉樹春風早春風花落新但見成
谿處幾得正冠人當知露井側復與妖桃鄰

賦晉傅玄李賦曰潛實內結豐彩外盈翠質未變形
隨運成種別類分或朱或黃甘酸得適美踰蜜房浮

采點駁赤者如丹入口流澣逸味難原

桃

春秋運斗樞曰玉衡星散爲桃

本草曰梟桃在樹不落殺百鬼

書曰武王克商放牛於桃林之野

禮記月令曰仲春之月桃始華

毛詩曰何彼穠矣華如桃李又曰園有桃其實之飴
又曰桃之夭夭灼灼其華桃之夭夭其葉蓁蓁又曰
投我以木桃報之以瓊瑤

易通卦驗驚蟄曰大壯初九桃不花倉庫多火

十州記曰東海有山名度索山有大桃樹屈盤數千里曰蟠桃

漢書曰惠帝五年十月桃花

孫卿子曰桃李舊榮於一時至乃殺其華其實之離騷曰斬伐橘柚列樹苦桃

文選曰南國有佳人容華若桃李又曰艷陽桃李節山桃發紅萼

拾遺記曰螭塘山去扶桑五萬里日所不及地寒則桃樹千圍其花青黑色萬歲一實

西京雜記曰漢明帝時常山獻巨桃核其桃霜下花

至暑方熟使植園林又曰漢武初修上林苑羣臣各獻果有緇核桃紫文桃金城桃

歲時記曰桃者五行之精壓伏邪氣制百鬼鹽鐵論曰桃李之實多者來歲足穰

地志曰有桃花塢桃花綬

典術曰桃者五木之精也今之作桃符著門上厭邪氣此仙木也

周書曰秦吏趙凱之私恨告國民吳旦生盜食宗廟御桃旦生對曰民不敢食也王曰剖其腹出其桃史記惡而書之曰食桃之肉常有遺核王不知此而剖

人腹以求桃非理也

晏子曰公孫捷田開疆古冶子事景公勇而無禮晏子言於公餽之二桃曰三子計功而食桃公孫曰吾再拜隱虎功可以食田曰吾杖兵而御三軍者再功可以食古冶子曰吾嘗濟河鼃銜左驂冶潛行水底逆流百步從流九里得鼃頭功可以食二子曰吾勇不若子功不逮子取桃不讓是貪也然而不死無勇也刎頸而歿冶曰二子歿之冶獨不逮又刎頸而歿

韓子曰昔者彌子瑕有寵於衛君與君遊於果園食桃而甘以其半啖君君曰忠乎忘其口而啖寡人及

彌子瑕色衰愛弛得罪於君君曰是故嘗啖我以餘桃又曰孔子侍坐於魯哀公哀公賜之桃與黍仲尼先飯黍而後噉桃哀公曰黍以雪桃也對曰丘知之矣夫黍五穀之長而桃爲下君子以賤雪貴不聞以貴雪賤也

莊子曰插桃枝於戶連灰其下童子入而不畏而鬼畏之是鬼智不如童子也

戰國策曰孟嘗君將入秦蘇秦往見之孟嘗曰人事者吾已知之所未聞者獨鬼事耳秦曰臣之來固且以鬼事見君矣臣來過淄上有土偶人焉與桃梗相

與語桃梗謂土偶人曰子西岸之土也埏子以爲人
至歲八月降雨下溜水至則子殘矣曰不然吾西岸
之土殘則復西岸耳子東園之桃梗也刺削子以爲
人降雨下溜水至流子而去則子漂漂者將何如矣
今秦四塞之國譬如虎口而君入之則臣不知君所
如矣孟嘗乃止

史記曰桃李不言下自成蹊

淮南萬畢術曰孤桃枝之券令雞夜鳴

取孤桃南北
行枝長三尺

折以爲券塗以三歲雄
雞血夜居棲下則鳴

漢武故事曰東郡獻短人呼東方朔朔至短人因指

朔謂上曰西王母種桃三千歲爲子此兒不良也已
三過偷之矣後西王母下出桃七枚母因噉二以五
枚與帝帝留核著前母問曰用此何上曰此桃美欲
種之母笑曰此桃三千年一著子非下土所植也
風俗通曰黃帝書稱上古之時有兄弟二人荼與檮
律度索山上桃樹下簡百鬼妄禍人則縛以葦索執
以食虎於是縣官以臘除夕飾桃人垂葦索畫虎於
門効前事也

山海經曰桃樹屈蟠二千里

列仙傳曰葛由羌人好刻木作羊賣之驕羊入蜀中

王侯貴人追上綏山皆得仙故里諺曰得綏山一桃
雖不能仙亦足以豪

尹喜內傳曰老子西遊省太真王母共食碧桃

紫梨

玄中記曰木子之大者有積石山之桃實焉大如十
斛籠

神仙傳曰樊夫人與劉剛俱有道術各自言勝中庭
有大桃樹夫妻各呪其一桃便闢相擊良久所呪桃
走出籬外又曰張陵沛人也弟子趙升就陵受學陵
以七事試之第七試者陵與諸弟子登雲臺山絕巖
上有一桃樹旁生石壁下臨不測去三四丈有桃大

實陵謂諸弟子曰得此桃者當告以道要弟子皆流汗無敢視者升曰神人所護何險之有乃從上自擲正投桃樹上取桃滿懷而石壁峻峭不能得還乃擲桃樹上二百二枚陵分桃賜諸弟子餘二枚陵自食一留一以待升陵乃申手引升升忽已還乃以向一桃與升又曰高丘公服餌桃膠得仙

晉起居注曰咸和六年寧州上言甘露降城北園林桃李等樹

陶潛桃花源記曰晉太康中武陵人捕魚從溪而行忽逢桃花林夾兩岸數百步無雜木芳華芬曖落英